

# Investir sul davegnir di joegn e del turism

A Tieser l'é stat enaudà l'prum percors de Auta Formazion che svilupea na fegura profesionèla con competenzes spezifiches e livie auc de responsabilità e autonomia

**Formazion** - Enstadi l'é stat enaudà a Tieser n nef percors de doi egn de Auta Formazion profesionèla per Tecnich di servijes tel chèder del turism e de l'acolienza, na scomenzadiva che se ouc ai joegn de la valèdes de Fascia e Fiem che à jà fenì la scola auta tel setor hotelier e i vel se spezialisèr amò de più.

Chest percors l'é stat studià fora da la Provinzia de Trent, a una con la istituzions del post, l'Enaip e la soziazioms de categoria che se dèsc jù a na vida o l'otra tel mond del turism sa mont, desche la Sociazion Hotelieres provinzièla, l'Union Hotelieres, la Confesercenti, la desvaliva Aziendes de Promozion turistica e la desvaliva scoles del teritorie, con chela de fèr n investiment sul davegnir di joegn ma ence sun chel del turism, olache la sinergia anter la calità e l'identità l'à semper più peis.

L cors va inant per doi egn e l perveit 3000 ores de formazion, de chestes passa 1300 les é dedichèdes a la pràtega te firma. Te chesta pruma edizion l'é 15 i joegn scric ite, che à passà na valutazion per poder aer azess.

L president de la Provinzia Ugo Rossi, entervegnù a l'inaudazion ence te sia viesta de assessor a l'istruzion, l'à reingrazià duc chi che se à dat jù per envièr via chesta esperienza, desmostran de esser bogn de meter ensema la forzes per n obietif ambizios. N reingraziament l'é jit ence ai joegn che ge à dat credit e sia families. A la zerimonia l'era ence l



*L president de la Provinzia Ugo Rossi a l'inaudazion del nef percors profesionèl.*

president de la Comunità de Fiem Giovanni Zanon, l president de Enaip Trentino Arrigo Dalfovo, l coordinador del cors Fausto Eccher, i conseieres provinzièi Bepe Detomas, Graziano Lozzer, Pietro de Godenz e amò de outra autoritèdes. Da più man l'é stat sotriassà l'emportanza de investir te la formazion soral duc ti momenc de crisa e l'emportanza che duta la forzes atives del teritorie laore ensema per viventèr n percors inovatif de formazion ma ence de lurier concret, l'element che califichèa dassen chesta neva oferta formativa. La fegura profesionèla pissèda l'à carateristiches polivalentes e trasversèles tel chèder turistic e de azet, la dèsc competenzes per poder tor dant problematiches tecniches e gestionèles relatives a la projetazion e la comercialisazion de prodoc turistics ma ence a la gestion economica e finanziàla de unitèdes

turistiches. L percors perveit doi momenc formatives che met ensema l svilup de chesta competenzes con l contribut de profesionisè empotanc e esperc del setor. Più en generèl l'Auta Formazion svilupea fegures con gran preparazion, competenzes spezifiches e livie auc de responsabilità e autonomia. I corsc va inant doi egn, i se loga al quinto nivel del chèder european de la califcazioms (EQF) e a la fin i dèsc n diplom de tecnich superior, che l'à la medema valuta de chel dat a la fin di percorsc di Istitut Tecnic Superior naziunèl.

Con chest an la Provinzia à investì n muie te l'Auta Formazion profesionèla, smaoran l'offerta con doi neves percors inovatives, anter chisc chel de Tieser, e l scomenz anuèl de ogne percors, a desferenza del passà canche se tachèa demò a la fin de ogne edizion, donca ogne doi egn.